

Presentada

Est cun praxeri mannu chi presentu sa pubbricatzioni de is poesias e de is cumponentus in prosa chi ant pigau parti a sa de tres editzionis “Poetendi e Contendi - Scalepranu in poesia”, cuncordau de s’Amministratzioni nosta cun s’agiudu de sa Bibrioteca comunali, de su Sistema Bibriotecàriu de su Sarcidanu e de sa Província de Casteddu.

Mancai su pagu tempus a contu nostu po organitzai su Cuncursu is arresurtaus non podiant essiri mellus: sa cantidadi ma sumpepari sa calidadi de is òperas presentadas funt a su paris de cussas de àterus Prémios de poesia sarda, chi tenint una traditzioni e un’istória prus longa, ma fintzas prus finantziamentus e visibilitadi me in is média.

Si podeus cunsiderai diaberus cuntentus po àiri bintu un’àtera iscumissa culturali chi favoressit sa língua sarda.

Custus funt is númerus: 50 poesias e 25 contus, a innui atungeus is 26 poesias e is 10 contus iscritus de is iscientis de s’iscola de Scalepranu, siat de is médias siat de sa primària.

Ma fintzas custa borta est sa calidadi de is chi ant presentau is traballus insoru a antimai su Prémio, e funt: Càrala Casula 1^u premiu po sa setzioni de sa poesia, nàscia in Tàtari ma bivit tra mesu s’Alighera, Macumere e Casteddu, est una poetessa giòvuna, chi at giai pubbricau duas arregortas poéticas in Itallianu (*Scialli di luna* in su 2002 e *Parole all’orizzonte* in su 2005, Domu Imprentadora Nemapress de s’Alighera). **Càrala Casula**, giornalista pubbricista, istudiat glotològia in s’Universitàdi de Casteddu, impenniada in circas linguísticas at iscritu medas artículus po s’arrivista de Nùgoro s’*Ortobene*. At pigau parti a medas Cuncursus de poesia sarda, a su primu Cuncursu de Scalepranu furiat bessia segunda. Sa poesia sua, iscrita in Logudoresu, cun calencuna intradura in Nugoresu e in Brabaxinu, arresurtat media beni, galana e iscirrada.

Gonàriu Carta Brocca, 1^u prémio po sa setzioni prosa, durgalesu, iscriit in limba, siat poesias che contus, de candu teniat bint’annus. In su 1989 cumintzat a pigai parti a is Cuncursus de poesia sarda incungendi sémpiri arresurtaus de importu mannu, in su 1996 otenit su Prémio “Romàngia” e pubbricat su primu líburu de poesias arretulau *Sos càntigos de s’ae*. In su 2000 bincit su Prémio “Michelangelo Pira” chi ddi permitit de pubbricai sa segunda arregorta de poesias arretulada *Tera*. In su 2001 essit unu líburu suu de paristórias *Sos sette de s’arcu ‘e chelu*”.

Su chi incantat de s’iscritura de Gonàriu Carta Brocca est su tràgiu bonu, s’arrichesa de is fueddus chi imperat paris a su manixu chi ndi fait in língua sarda.

Sandru Chiappori est su segundu bincidori po sa setzioni poesia, casteddàiu, iscriit in campidanesu ma fintzas in logudoresu e in gadduresu, in prosa e in poesia. Issu puru est prus che bincidori de Prémios: in su 1991 bincit su “Premio Gallura”, siat po sa prosa che po su triatu; apustis at a binci su Prémio “Luras” po sa poesia e su Prémio “Gramsci” po sa prosa. E bincit fintzas duas editzionis de su Cuncursu “Montanaru” in su ’92 e in su ’94, cuàturu editzionis de su “Parteolla” e diainci sighendu. A ddus nomenai totus iat a èssiri difícili ca funt prus de 160 is arriconnoscimentus apillaus. In campidanesu at fintzas pubbricau sa cumédia “*Su camellu de Antoninu*”.

Is àterus bincidoris funt: a su segundu postu **Àngiulu Podda** de Casteddu po sa prosa, su de tres est **Gianni Pàulu Salaris** de Terraba po sa poesia, e **Ivu Múrgia** po sa prosa, giòvunu operatori de sa língua sarda, chi tenit a incuru unu giassu internet dedicau própiu a sa língua e a sa cultura sarda. E po acabbai tocat a fueddai de is autoris e de is òperas chi si funt distintas: **Micheli Podda**, ollollaesu, giai bincidori de medas prémios; **Madalena Frau**, ollollaesa issa puru, chi at giai cuncordau duas bellas arregortas de poesias *Lugore de luna* in su 2002 e *Sas meraviglias de Don Bosco* in su 2005; **Santinu Marteddu** de Thiniscole, issu puru poeta prus che bincidori: at fintzas bintu su primu prèmiu po sa poesia in su segundu Cuncursu de Scalepranu; **Gianni Luisu Sulis**, iscalebranesu, s'annu passau at bintu su segundu postu po sa setzioni de sa prosa e cust'annu puru s'est fatu onori; **Veronica Atzei**, bivit in Turri, giòvuna istudiosa de diora meda s'ocupat de sa balorizatzioni de sa língua sarda, at iscritu po sa Cannaca "*Ómines e féminas de gabbale*" de s'Alfa Editora, una monografia, fata impari a Frantziscu Casula, de Giusepi Dessì.

E ancora **Càralu Mulas** de Casteddu, **Srabadori Frau** de Désulu e totu is àterus chi ant pigau parti, a totus torraus gràtzias po s'importu chi ant donau a su Cuncursu nostu ma sumpepari po afortiai cun is òperas insoru sa visibbilitadi de sa língua sarda.

Nc'est de arregodai sa partecipatzioni de totu is iscientis iscalebranesus: chi iaus a bòlliri chi essant de prus in is editzionis benidoras, cun òperas sèmpiri prus de calidadi: po custu apretaus is maistus ma fintzas is famíllias a incoragiai is giòvunus a imperai sa língua sarda, siat po fueddai siat po iscriri ca seus sigurus ca est un'arrichesa culturali de profetu po sa formatzioni insoru.

E po disciniri torraus gràtzias a totus is chi ant atèndiu a s'organizatzioni po sa sorti de su de tres Cuncursus "Scalepranu in poesia", a sa giuria: a su Presidenti prof. **Frantziscu Casula**, a sa prof.ssa **Franca Marcialis** e a sa Dott.ssa **Bruna Siriu**.

Bissentì Demontis, Síndigu de Scalepranu